



6. august 2024

UKA2024/100

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Naartunermi, erninermi meeravissiarthaarnermilu sulinngiffeqartarneq pillugu anaanaasut tamarmik sapaatip akunneranut akunnernik 40-nik erninerminnik, sapaatit akunnerini 19-  
ini, sionratigut suliffigisimasaq apeqqutaatinnagu ullormusiaqarnissaasa  
pisinnaatitaaffigilernissaannut, Inatsisartut inatsisaasa allanngortinnissaanut  
Naalakkersuisut peqquneqarnissaannik Inatsisartut aalajangiiffigisassaattut siunnersuut.**  
(Inatsisartunut ilaasortaq Jens Napaattoq, Naleraq)

### **Tunnngavilersuut:**

Erninermi ullormusiaqarnerup siunertarivaa isumannaarnissaa angajoqqaat aningaasatigut tapersernissaat ernereerminni sulinngiffeqarneranni, tamannalu periarfissiivoq inoorlaap ilaginissaanut ilaqtutariinnerullu peqqinnartumik aallartinnissaanut meeqqamut iluaqutaasusaaq.

Ajoraluartumik qinikkatut pisariaqanngitsumik naligiinnginnerujussuarmik pilersitsisimavugut atugarissaarnerusut salliunneranni, inuiaqatigiinni meeqqap iluaqutissaa salliunneqarani, kisianni angajoqqaajusut isertitaat. Killormulli aningaasanik agguataarinikkut.

Isertitaqarnerugaanni, inuiaqatigiit meeqqamut angajoqqaanullu akiliinerusarput. "Robin Hood"-i killormoortoq pisariaqanngitsumik pissakinnerit meeraallu annikinnermik ernereerminni aningaasarsitillugit.

Tamanna nalunnginneqaatigissanngilarput. Meeqqamut iluaqutaasoq angajoqqaallu periarfissaat meeqqamut pitsaasoq aallartinnerlu peqqinnarnerusoq salliuttariaqarparput.

Inuiaqatigiinni eqimattakkaarpasuit eqqugaapput pisariaqanngitsumik naligiinnginnerup pilersinneqarnerani. Aalisartukkormiut, piniartukkormiut, savaatillit, anaanat kisimiittut allallu nalunnginneqaatigissanngilarput salliunneqannginneri atorfillit meeraannut sanilliutissagaanni.

Meeqqat tamarmik inuunermi pitsaanerpaamik aallartiffeqassapput.

Taamaattumik meeqqamut pitsaanerusoq salliunneqassappat, inuiaqatigiinnilu naligiinnerusoqassappat, siunnersuut tamanna pingaaruteqarpoq meeqqamut toqqissisimanermik pilersitsissamat, angajoqqaanut, ilaqaatasunut, siunissamilu meeqqap peroriartorfigisassaani.

**Pisortanut aningaasatigut allaffissornikkullu kingunerisassai:**



Anaanat angerlarsimaannartut erninermusiaat tulluarsarsinnaasuuppata atorfilittut, qaffassinnaagaluarpoq sapaatip akunneranut akunnernik 14-iniit erninermorsiaqarnermiit sapaatip akunneranut akunnernut 40-t tikillugit.

Sapaatip akunneranut 1.490,58 kr.-miit (106,47 kr. x akunnerit 14-it) sapaatip akunneranut 4.258,80 kr.-mut (106,47 kr. x akunnerit 40-t). Tamanna isumaqassaaq anaanaq sapaatip akunneranut 2.768,22 kr.-mik isertitaqarnerulissamat.

Erninermusiat sapaatip akunnerni 19-ini 28.321,02 kr.-miit (1.490,58 kr x sapaatit akunneri 19-it) 80.917,20 kr.-nut (4.258,80 x sapaatit akunneri 19-it), malitsigissavaa aningaasartuutaasut 52.596,18 kr-it qaffanneri anaanamut ataatsimut.

2024-mut aningaasanut inatsimmi 26 mio. kr.-t immikkoortinneqarsimapput tassungaartut. Ernereernermi ullormusiat anaananut angerlarsimaannartunut annertusipput annertussusiliusaaq qaffasinnerpaap ataatsimut aningaasartuutigissavaa qaavatigut ukiormut 30-35 mio. kr.-t ernereernermi ullormusianut.

Naalackersuisut akissutiminni ukiumut annertunerpaamik 9 mio. kr.-nik qaffassasoq nalilersimavaat.

**Namminersortunut aningaasaatigut allaffissornikkullu kingunerisassai:**  
Soqanngilaq.

**Innuttaasunut aningaasaatigut allaffissornikkullu kingunerisassai:**

Katisimasut angerlarsimaannartut, inooqatillit, aalisartut, piniartut savaatillillu, anaanat kisimiittut angerlarsimaannartut, allallu, ilaqutariit angajoqqaanngorlaat aningaasaatigut oqilisaavigineqarujussuassapput isumannaarneqassallunilu naligiinnerusoq meeqqamut iluaqutaasusaaq.